

НА ЛИТИИ

Стихира новомучеником, глас 6.

Подобен: Отчаянная: Творение святителя Афанасия Ковровского:

Отчаянии есмы жития ради/ и не имамы нрава добродетельна,/ яко миро, приносим Ти, Господи,/ молитвы святых сродников наших./ Не отвержи Русь издревле Святую,/ ныне же грехов наших ради люте страждающую./ Не презри слезы верных сынов,/ колен своих пред Баалом не преклонявших,/ и ихже не поразил еси, согрешающих.// Приими нас, кающихся, Боже, святых Твоих мольбами.

Слава, глас 8:

Приидите, мучениколюбцы,/ приидите, составим лик,/ торжествующе и Бога прославляюще/ в радостный праздник новомучеников и исповедников Российских,/ сии бо не уклонишася скорби,/ ни убоявшася темницы,/ горькими работы, гладом и хладом изморени/ и многовидными муками умерщвляеми,/ яко агнцы незлобивии, смерть прияша./ И ныне в радости святых/ молят Триединаго Бога о земнем отечестве своем.

И ныне, глас тойже:

Владычице, приими молитвы раб Твоих// и избави нас от всякия нужды и печали.

НА СТИХОВНЕ

Стихира воскресна гласа.

**Также стихиры новомучеником, глас 2¹. Подобен: Доме Евфрафов:
Творение святителя Афанасия Ковровского:**

¹ Существует практика петь стихиры «Земле Русская...», «Церковь Русская...», «Соборе святых русских...», «Новый доме Евфрафов...» как одну стихири (подряд, без стихов) на «Славу»:

Земле Русская,/ граде святый,/ украсай твой дом,/ в немже Божественный/ велий сонм святых прослави.

Стих: Господи, Господь наш,/ яко чудно Имя Твое по всей земли.
Церковь Русская,/ красуйся и ликуй,/ се бо чада твоя/ Престолу Владычню/ во славе предстоят, радующеся.

Стих: Святым, иже суть на земли Его,/ удиви Господь вся хотения Своя в них.

Соборе святых русских,/ полче Божественный,/ молитесь ко Господу/ о земном отечестве вашем/ и о почитающих вас любовию.

Слава, глас и подобен тойже:

Новый доме Евфрафов,/ уделе избранный,/ Русь Святая,/ храни веру Православную,/ в нейже тебе утверждение.

И ныне, Богородичен, глас 8. Подобен: «О, преславнаго чудесе»:

О, преславнаго чудесе!/ Небесе и земли Царица,/ от святых сродников наших умоляемая,/ до ныне землю Русскую покрывает/ и лика Своего изображении милостивно обогащает./ О, Владычице Державная!/ Не престани и на будущее время/ во утверждение на Руси Православия/ милости и чудеса изливати до века. Аминь.

На благословении хлебов Богородице Дево: дважды, и тропарь новомучеником, глас 4, единожды.

Тропарь новомучеником, глас 4:

Днесь радостно ликует Церковь Русская,/ прославляющи новомученики и исповéдники своя:/ святители и иерéи,/ цáрственныея страстотéрпцы,/ благоверныея князи и княгíни,/ преподóбныя мúжи и жены/ и вся православныея христиáны,/ во дни гонения безбóжного/ жизнь свою за веру во Христа положивши/ и кровьмí Истину соблóдшия./ Тех представительством, Долготерпеливе Гóсподи,/ страну нашу в Правослáвии сохрани// до скончания вéка.